



秋澗先生大全文集卷第五十四

碑

大都復虞帝廟碑

幽陵之祠虞帝所從來綿邈廟據金故苑西北維兵
後廢不治獨唐貞元間復廟碑宛在瑣頤人屢欲
易去窘焉以它用主者心懍恍若有倣動廼已厥後
道士陳志玄直廟西百舉武起真陽觀爲長春別院
復購焉約不犯元刻用石背勒營建本始備力來徙
碑與跌圻身挺植重不克舉仆道士惕息磬折向碑
祝曰今神顯思若是願置安處且遠荒穢尚敢他用
以躋聖靈神惟降監庶畢茲志安載而去吁亦異哉
初樞密趙公良弼嘗建學宮於鄉縣永志玄爲工師

既迄功以徙碑事蹟來告公曰嗚呼噫嘻皇乎休哉
惟帝明德萬古是式况奠土茫茫折而爲幽州者帝
之所經畫宜乎燕人祠饗不忘廟屢廢而旋復也又
遺碑巋然自唐歷五代遼金當

大元戊寅凡五百有餘歲神物護持俾勿壞汝歸興
復之責不在師乎志玄曰唯即以道宮丕構作新廟
而奉黼宸焉既而趙公將志玄之懇以復廟記見屬
其拜手稽首而颺言曰日月星辰帝文明也君臣父
子帝彞倫也山川風土帝疆域也是則聲教所暨魏
巍乎與天地同休孰能名而能報哉今志玄黃冠師
因趙公一言而復數百年之舊俾來者瞻天就日知
慕帝德如蟻之赴羶可謂推原道本敬其所當敬乃

知天理之在人心者曾一息而間斷邪至於稽古樂
善因機就功毗贊

皇猷思成比封之美又以見趙公事君治民孳孳焉
以堯舜之道存其心者也誠宜特書以詔來哲仍繫
樂章使都人歲時祀饗登以歌焉其詞曰

帝降諸馮東方人兮幽幽深山鹿豕群兮耕稼陶漁
至爲帝兮風動八區烝一又兮矧惟析津帝經制兮
物不苦窳化土泥兮聖靈在天濡鴻私兮阜財解愠
南薰時兮鳶飛魚躍日用而不知兮風移俗變天理
存厥彞兮燕人懷思歆明德而祠兮八音庭陳鳳來
儀兮九疑雲深望何依兮我賡九歌言匪空兮皇天
降衷克綏惟帝聰兮恫彼下民中庸其鮮充兮嗚呼

胡能一天下之慮允執其中兮

大元故中奉大夫浙東道宣慰使陳公神道碑
銘并序

士有奮身韋布作時蓋臣志足以有爲材足以應變
氣足以充守學足以明義毅然以致君澤民爲已任
雖凶獲克畢厥志不幸而罹患難猶能挺樹名節勵
薄俗於當年激清風於來代占難其人今於宣慰陳
公見之矣公諱祐字慶甫世家趙之寧晉爲人固窮
尚志好讀書耻陸出馬混泥塗間癸丑歲以藝能應
穆王府辟一見而列侍從官公勤勞所事進盡忠言
王嘉其大有裨益遂賜號尚書俾顯異於衆及分土
其監與守承制封拜以公充本道軍民總管

洛邑閩河衝會政荒民耗困於兵賦轉輸不大更
張之將無以爲治即啓其利病之要者得共四事率
如請又奏免征西屯田軍士數百家歲負糧料及椒
竹等課甚衆自是殿夷屎息日就安集之樂八年間
規爲保障率以身爲律度至今人賴其惠至元二年
調官制行授奉政大夫南京路治中徐宿大蝗移公
督捕役農民數萬度其勢猝不能殲秋稼垂成即散
遣收穫自揀不然棄遺無餘或以不可諫曰救萬獲
罪迺所甘心

朝廷以從權躓之尋授嘉議大夫衛輝路總管其治
比洛愈精勵有方正官紀革吏習杜私交審聽斷務
以至誠感發期於實惠及民每庸調之下必經畫寬

便使民有餘力部內屯戍習豪橫賦民三蔑如莫敢
誰何公因事致詰落其機牙衆譁噪擁其長以來意
在振觸公坐廳事上折之以理厲聲色略不相假實
為氣褻而退自是闔境肅然奉教條惟謹復比干祀
大起孔子廟暇則集諸生肄經史以敦教本至風化
大行吏民稱美刻石以頌之時憲臺勅立首以材擢
授山東東西道提刑按察使公憲其責與志合踴厲
英發擊豪右搥姦伏逆見隨決所至以神明稱貪墨
者徃徃投劾而去褰帷具瞻有風動百城之目平時
底蘊雖略張設而惓惓
朝廷之心不食寢忘嘗以三本陳事忠嘉剴切反覆
論列至累數千言大率

太子國本建立之際宜早中書政本責成之任宜顯
人材治本選舉之方宜審又群小流言干撓庶政恐
習以成風私門萬啓於下公道孤立於上臣知承平
吉祥之言必不出於若輩之口事雖不報士論偉焉
時機務多出尚書權臣意欲獨顯柄用乃以併中書
設三公為言事下大臣勅公預其議有說公宜審
所向可致大用公不顧乃直言可否曰中書政本所
係併尚書為一省便右丞相安童位尊望重宜端揆
如故三公虛位不須設置衆因以聞事遂寢斯皆
國家大計人所持難公慨然吐論曾不少顧自是忠
直之名聞於蓋代然不說者衆矣俄遣簽書中興行
省事十三年改授南京路總管兼開封府尹屬吏憚

公方嚴有不安者仍諭之曰汝昔爲顏今距吾以法
繩之昔爲跖今顏吾以禮遇之善惡自取吾何心其
間衆悅弭耳趨事許蔡郊有劇盜號賊李三黨結甚
衆軒頌囂嘯公然剽劫兇艷動兩河間及公來逸去
以計捕獲即擗殺之萬口稱快明年春進拜中奉大
夫浙東道宣慰使時江左初下人情詭軌例賂遺相
尚公表以廉正濟以恩威遠懷邇又浙人忘亡其不
貪毋擾之戒茲有驗矣福建平大軍俘溫台新附萬
餘人而西公力爲申援還民伍者什七八越校廩繼
米幾萬斛掩爲兵食驗籍復于舊行省下令筭商酤
頌亟公建言兵後瘡痍未復宜停征以示優卹遂檄
公覆明台營田歸頌新昌值玉山寇出剽報至衆謂

可去曰吾守土臣義不當避去之民曷依俄兇黨突
入衆寡不敵遂遇害實至元丁丑歲九月七日也得
年五十有六靈輜抵越人士素服哭祭皆失聲願留
葬起祠以奉嗚呼非守義不回推忠及物安能感人
心如是子夔請兵討復得首惡七人僇越州市次子
臯扶其喪歸殯洛陽縣之北邙原公剛明廉介博學
有經濟材信道篤立志堅從政果於應變爲尤長氣
之所充雖百折不撓故處大事臨大節審量合義挺
然力行要欲表表有所見於世而勢利可得奪耶其
愛君憂國之忠出天性固然與人交有終始不可干
以私官二千石三十年自奉猶寒士不知富貴爲何
物可謂甘貧苦節不媿神明者也以用罔能盡死非

其所訃聞識與不識舉為愴惜之生平喜作詩辭必已出能道所欲言節齋其別號云曾祖懷妣范氏祖忠妣張氏世在野父諱子安性慈祥美丰儀易農而醫壬辰際以其術多所全活陳氏之興豈其是邪用公貴封資德大夫妣張氏順德夫人賜錦衣各一襲公夫人翟氏以貞靜能安公貧子三人長曰夔武略將軍佩金虎符充某路行軍總管次曰臯讀書克家矯矯偕有父風次庶未名女三俱適士族孫八男女各四人卒事之明年孤子夔等喪服纍然百拜涕泗以墓碑為請因念公與不肖交素厚死生之際三入予夢皆有明徵豈非精爽交感動於彼而應於此然耶雖既挽而復誄其感於予心者固有所未盡今屬

筆來圖不朽以義以分其敢以不敏辭謹按母弟知府天祥善狀勉為論次之銘曰

維天降材

畀我其治

其道伊何

曰忠與義

安而行之

匪功匪利

致君堯虞

否乃予愧

不曰蓋臣

其將孰謂

堂堂陳公

元精貫中

貞亮之義

謇諤之忠

以剛而順

以介而通

養我浩氣

塞乎昊穹

一朝遭際

奮從

雲龍

即事進諫

礪夫深衷

列二千石

敏焉赴功

以德以讓

禦兩漢風

擢登使車

攬轡而東

三年齊魯

一鷄橫空

治安陳書

衮職是縫

明我國本

如棟之隆

瓦庭預議

孰知雷同

屹然有立

砥柱河衝

望公廟朝

帝載奮庸

持節江海

卒與衮逢

命也何言

其來則豐

哀哀嗣侯

子職大供

臨江一衝

揃夷蕪兒

憤雪九泉

與沒其躬

瘞陶之墟

浹川溶溶

願瞻佳城

祖彌是從

魂兮歸來

安此新宮

忠傳孝繼

有決其瀕

是維慶父之表過者敬恭

大元故真定路兵馬都總管史公神道碑

銘并序

雲雷合奮屯難伊始君子以經綸為難攬捨廓清恢
我文治世臣以守成為重維史氏倡大義起營朔爰
自都帥公仗鉞分閭來殿鎮方擴武略以濟屯角群
雄而宣力取威定霸於是乎在繼以太尉留後二公
篤忠貞昭嗣服治具繁張民物趨阜至於知垂創之
惟難審守持之匪易躬念成規洞焉恐墜卒之承先
志而推方岳之賢著治效而冠羣辟之列者總尹史
公其選哉公諱楫字大濟世為大興永清縣農里大
家曰成珪者公之曾大父行北京六部尚書曰秉直
者公之大父金紫光祿大夫河北西路兵馬都元帥
曰天倪者公皇考也初乙酉歲父金紫公遭罹仙難

時侯齒雖穉資稟剛毅沉塞已能從叔父忠武公破走仙復真定衆謂臧孫達其有後於魯矣及長不妄言笑善騎射博戲音樂略無所意開府公竒其好尚不凡令給事左右俾習知政務己亥歲奏授公知中山府事惟定武衝會務殷使輶營帳中外騷屑公措畫有方數年間民賴以安尋充征南行軍萬戶翼經略公徇地蘄黃間當戰攻殊力值阻乏則頓舍樵爨經營百至甘苦與衆共之及還一卒無飢疫失所者丞相以公材果從政治兵皆所於可壬寅春引覲太宗皇帝奏曰臣先兄天倪死事際緣姪楫孺攝行其職今業克負荷請解所佩金虎符畀之臣天澤備列戎行俾兄不失舊物臣之願也

上大加稱賞卽授公真定路兵馬都總管涖政之初願惟鎮府表山帶河連屬三十餘城生殺進退咸倚賴決一旦惴惴繼述有夙興夜寐謹身帥先明政化信賞罰任良能汰貪墨劭厲農工惠鮮鰥寡庶繭絲輕而保障之功可立辛亥歲朝廷肇議賦額戶率徵白金一錢名曰包塚銀諸路審其重莫敢倡言公毅然上請曰兵後生意未蘇民恐不堪如銀與物折各減二數庶民力少寬且無逋負允其請詔爲定制迄今天下賴焉各道發楮幣貿遷例不越境所司較固取息二三歲一更易致虛耗元胎商旅不通公騰奏

皇太后立銀鈔相權法度低昂而爲重輕變溢滯而

爲通便時又有言食者之醬請按籍計口播散者業以從之公詣行臺論其不可曰鹽鐵本貿易物難同差統一例配者今民貧單弱是愈抵於困不若依舊便議遂寢嘗有寇行劫保之南鄙捕同獲時檄所在如盜數償主公與保將賈會境上議強歸于我公弗辨徐曰盡付之第切發地約弊邑耕斲去其囊橐以絕後患何如賈悟遂誅我免輸償錢數千緡元氏郭其姓者愬府僚屬於達官按脫既而貧無實達官怒欲抵郭死公力請釋之曰此人以重辟謀陷汝等何援爲公曰殄之以懲後未若宥之死愧其心也况人命至重豈以妄言某等卒窮極戮哉竟杖而遣之辛亥斷事官也里干脫火思來按本部性苛察熹事凡

被劾者凌轢羅織莫有脫其殼者公能隱忍將順使虐焰斂熯不致濫及非辜害吾事而已其已籍沒者十數家公奏明其寃竟皆復業公之拯時濟物民得受一分賜其不自顧藉類多此中統建元首授公真定路總管同判本道宣撫司事遂舉明州縣文學屬吏三十餘人後皆致通顯云三年齊叛平忠武公首奏兵民之戢不可併居一門行之請自臣家始公即日解紱以戢讓其弟江漢大都督權角巾私第裕如也遂選勝西郊築治亭圃日以植花木玩泉石爲佚老之計澤車欵段徜徉游詠人不知爲故侯失將也以至元九年二月遘疾越廿日薨於正寢春秋五十有九某月日葬獲鹿縣明立鄉安社里之西原公

之純正蒞官嚴恪親戚左右罔敢一語私於其間至若民情鬱而未宣時政舛而未便寢饋為不安思有更張而後已終其身無聲色逸靡之娛其奉上接物刻已自厲不一毫及民前後積負至四百餘定弃官日方議易田宅以償

朝廷憫其廉為代輸焉故在官三十年間時和歲豐政平訟理鎮之士民輕裘緩帶鳴絲跕躡嬉遊宴衍樂史氏之無事內則連薨接棟井肆夥繁河朔兵餘獨稱萬家之盛外則阡陌從橫耕耒弥望熙熙然為樂郊之民及暮而報政崇獎聲實俾為諸道法宜矣夫人三完顏氏北京路左副元帥某之女散竹氏金紫先祿大夫北京七路兵馬都元帥烏野兒長女蒲

散氏子男共一人曰炫武德將軍常德府管軍總管曰烱蚤世曰輝奉訓大夫孟州知州曰燧朝列大夫東昌府同知曰熒曰燁卒曰炷輝曰焯潼關提舉曰燭燃炎曰煬承直郎簽嶺南廣西道按察司事日燧行省宣使曰煨烘炬炘烜炯女子一十三人俱適華族孫男共三人長塔列赤武德將軍鄂州管軍千戶餘並幼女孫一十七人若子與孫服庭訓迪檢押略無紈綺驕豪之習影纓若綬爛焉盈門詩云靖共尔位好是正直神之聽之介尔景福公誠有焉公薨之十年嗣子輝熒介公弟征東經略使樞御史中丞彬以神門之表來禱其惟曩列省郎公以民事上計意有未安者憂形於色固已切嘆其有志於民及按部

燕南延見故老歌頌遺愛有不能忘者又知夫流風
善政感人之深也如是輒第其門士李豹善狀而系
之以銘其辭曰

繫農之務世服勤
史維累葉耕而耘
惟元再傳彪其文
中天草昧殊未分
豈其垂裕彌後昆
是爲明府皇考君
已能馳射精絕倫
堂堂大府恒山軍
於鑠叔武經且綸

正以篤實天爲親
一氣厚積生元臣
弱冠崛起乘風雲
亦能當關收元勳
大忠遽掩豺豕群
公今嗣封昔孤童
利器小試無輪困
一日作牧兩漢循
大綱一舉萬日振

如何畫法參能遵
弊去泰甚輕絲銀
斂回煬艷燹吾身
載其清靜民謐寧
潭園水滿花氣薰
崇高有餘足具陳
公堂爨食坐日曛
絃歌萬家和氣盪
系麻蔽日原隰昞
歲時報政

保民無踰家富殷
權臣按事何斤斤
拔濯良善脫已焚
丹砂成金頑化仁
高牙大纛馳朱輪
公曾目覩耳弗聞
念念民事憂絲棼
農夫不識城四圍
熙熙鎮土三十春

帝乃訢
白頭一德酬國恩

褒顯班上諸侯綌
用昭先功畫麒麟

惟真報果忠與純

慶流又見螽斯孫

功成身退素所云

笑解留務遠世紛

郊園花木清而芬

拂衣去作封山神

空餘遺愛露邦氓

甘棠懷思墮淚存

零落何必西州門

嗣侯追報圖不泯

哀號同極悲秋旻

我銘騰芳舌可捫

擬配大茂增雄尊

孝思永言世所敦

淇州創建故江淮都轉運使周府君祠堂

碑銘

郡邑之設因形勝而稱望雄由變遷而有併置至於
廢起千載之餘功垂百世之後俾存歿懷思感人心
而不忘者非豪傑經濟之士未易致也朝歌殷故

兩漢縣焉魏齊來移理衛縣河朔經途東出鉅橋

陌而朝歌遂墟天兵南下鉅橋正途亦廢自太行

東接浚郊莽為林灌行者並山取捷躡跡於兔蹊鹿

町之間又分當相魏汲三會之郊盜賊囊橐其間日

禦人為尋常邦君邑長顧目前不遑奚暇遠圖哉故

羣行恣睢莫敢誰何者有季於茲壬子秋

國家經略江淮擢行臺聽事官周侯充諸道轉運軍

諸使仍置司于胙侯道出朝歌登鹿臺遺址顧瞻河

山愛其沃壤且嘆夫梗阻若爾慨然懷闢易興除之

舉乙卯歲公以事北覲圖利害上之

朝廷為開可詔以彰德大名衛輝漏版戶五千實
焉復其徵三年因易號曰淇州縣曰臨淇特

勅公領辦其事於是推賢擇能申令講治設官府建倉廩立市廛外則表疆理布立聚開阡陌梁津夷嶮以便行路置淇奧思德南陽薛村等鎮以間迥曠耕牛田噐及飢貧不自存者一仰給於官下至取材于山陶甃于野率躬親規畫略無倦色西山鐵官麓竈公出本資悉發其伏利自是四方流徙願受廛胥宇者日接踵而至商通工易貨委闐闐餘糧畝棲煙火連甍鳴雞吠犬相聞和樂之氣達乎四境俟復以旣庶且逸無教可乎遂建孔廟立學師敦化基而厚薄俗不五載內外修治井井可觀邑居過客相與咨嗟嘆息曰曩以荒煙廢堞之墟化為樂郊樂國向也流通傭耕之民今為恒產完美之室雖天休涵濡非

我公建白興造之力疇克臻此既而公薨于位予錯襲職繼述先志有光於前者至元癸亥轉官制行州隸于衛耆舊馬良等謀于衆曰公去世逾遠吾輩生理日完嗣侯又歷官它郡其開建本末郊翼深恩匪立祠樹碑奉祀光揚何以報盛德而圖不朽迺相率度治城乾方爽壇地廟而貌之十三年秋適嗣侯自魏府別駕代歸良等邀過妹邦大合樂以落之相與請予文以紀其實走早辱公知敢以不敏辭念古之君子興事造功率忠愛持心無一毫功利自私克成碩大光明之業故民戴之如父母仰之如神明耳矣如公初以轉致之便興廢棄於荒殘因立聚之成養流播於完實又未嘗占據膏腴營治已私為務誠可

謂持心忠愛豪傑經濟者矣致感人心存歿罔間耿
耿不忘者如是據禮當祀在法宜銘公諱某字德甫
晉之隰人孝悌忠信慷慨尚氣義蚤以材術振耀一
時仕至江淮都轉運使其豐功碩德具載墓碑茲不
復云今嗣侯自武德將軍陞嘉議大夫佩金虎符淮
東高郵軍總管銘曰

河山兩戒殷故墟

自昔土壤稱膏腴

千年廢治灌莽區

始侶泐藪歲逃逋

政以規畫無良圖

堂堂周侯烈丈夫

一朝正門曳華裾

利焉思興害思除

南來主漕過此都

願嗟形勝資豺豕

忍

龍庭入奏為允俞
郊圻申畫開井廬
日中市集百貨俱
流民賴之彫瘵蘇
夫耕婦織圃有蔬
芄芄翠浪西山隅
我衣我食公所予
胡不均弘秉事樞
公去雖遠愛豈殊
闕宮盤盤列綺疏
歲時豆籩民駿趨
坎坎鼓擊吹笙竽

一語能霑天恩濡
連薨表植左右閭
荒榛一旦為亨衢
勞俸又復三年租
桑無附枝麥兩塗
昔馬餬口今羸餘
欲報之德父母且
天奪之速為世吁
身後報謝當何如
繪肖公像儼以居
曝牲在几酒在壺
睇公風馬乘雲車

神兮歸來意恒愉

風時雨若蛇虫菹

甌婁滿篝厲鬼驅

我詩剗石誠匪諛

採之民謠與同符

大書特書不一書

太行礪兮河帶紆

黃童白叟相携扶

猶有墮淚沾龜趺

資德大夫中書右丞益津郝氏世德碑銘

有序

至元十七年中奉大夫叅知政事禎進拜資德大夫
中書左丞被二品命服中外具瞻越郝氏惟煒公乃
頌宗屬言曰自惟踈薄烏能致此茲蓋我祖考勤勞
紫積篤祐餘澤集于後人乃克有濟今新壠辛建麗
牲有石惟是大書顯刻表飭神道庶幾報明靈昭裔

昧而傳永世然非賴篤古達辭者其將伊託遂以銘
章見囑公以寮雅故義不當辭謹條其族系世德祖
禰之所以銘詩維郝氏其先霸州益津縣人資德之曾諱
贊少擢律科第授憲部檢法爲人文無害以讞疑平
允稱正隆末遷司理叅軍佐進發部歿兵間曾妣鄉
進士王公之女德柔嘉有母儀祖諱誠長身秀髯丰
儀甚都早以義勇聞大定初獎死事子孫得叙用材
武授衛軍鈐轄盧溝當國都西門水潦時至艱於航
江承安中大起石梁府君首膺選督役疇辦最功陞
昭信校尉貞祐初燕不能都扈德陵南遷得疾卒官
下享年六十有七祖妣同開大家亦王氏姿淑貞事

舅姑孝謹生二子曰瑁曰珂壽七十有八終珂早世藁
場府君瑁即資德之顯考也天性孝悌初鈐轄府君
既南從靡所依藉奉母夫人走汴中涂困乏置母便
所與珂索食鴨間游兵遇偕馳之去敦武君泣請曰
弟幼不任事又母所鐘愛幸免以視義縱珂還行復
念珂終不能違將其母因跽而訴曰將軍以母故釋
弟然母老須瑁可生且為人子不竭力於其親將安
用爲敢以死請遂伏馬首不動兵怒以佩刀刺之即
仆地作死狀兵委去護母與父會後用恩例調京
城草場副使官至敦武校尉至元乙丑某同資德在
東平史侯幕獲升堂謁拜時敦武府君壽期頗氣貌
魁偉其齊家勤儉有法若一官府然資德年向五十

佑封君列鄉士長已貴朝夕溫清門內事必咨而後
行府君晚樂道家言遵其禁忌以靜默自處其修嚴
如此明年春二月遘疾考卒寮氏寓館春秋八十有
四資德扶柩歸葬真定縣西三里安上原之新任夫
人馬氏耐焉夫人出棗強腹族性貞烈主內務殊健
生平樂於為善至絕葷酒不御每晨興炷香禱曰願
聖人壽壽天下安妾家亦沾餘佑又月具饌食囚繫為
常初資德為郡決曹歲壬寅有盜劫臨城石帥家以
疑得免劉等十餘人繫之皆誣服上官趣論報夫人
訪聞里間有稱其寃者歸語資德曰捶楚下何求而
不得汝當盡心詳審恐及無辜資德亦方以賊驗未
白致詰及承教仍文移緩其事尋果獲真盜自是資

德於獄情愈恤慎後復全活張紇堯等十餘輩由是而觀昔雋京兆母聞不疑於囚徒多所平反即言笑異常不然慘而不食以夫人教戒方之賢於人遠甚又近舍有賣餅翁媪併凶喪不克舉夫人鬻粧奩中物掩瘞迄成禮非出天性能然邪中統甲子歲正月十二日以疾化於私居之正寢享年七十有四子男一即資德公女一適尚書許公孫五人曰思仁謹愿克家次思義資溫雅有幹局材官嘉議大夫諸路人匠府總管次思忠性果達少中大夫同知真定路總管府事次思禮思敬重孫二女孫二竊嘗論古之人因陰積而獲顯報由仕宦而位公卿者多矣然非濟以材德則卿相之任有不克負荷者今郝氏連世孝

友純善罔侈厥報委積流衍介祉於資德公公廼傳德襲訓自微而著莫不材稱故能依光藉潤遂貳台輔是皆祖宗載基載播于前而公以材德肯構肯穫充大光揚于後故也今復援賜鼎歌鐘之例載德象容刻銘樂石垂示無忘可謂適追先業濟其世美者矣其詩曰

商啓期封

肇迹太原

因鄉定氏

郝姓乃蕃

晏相夔將

寔爲裔孫

逮晉中圯

族系枝分

散處朔南

異宗同源

夔俊相唐

立朝直聞

義形于主

忠烈名存

維德繼顯

乃理之脩

暨暨司法

奮跡益津

平讞庶獄

廷無寃民

毅然就列

償彼祗勤

於赫鈐轄

職司徼巡

駕梁桑乾

萬石鱗鱗

神工雲儔

增秩疇勛

敦武趨父

奉母南奔

中涂阨阻

孝義兩伸

施於閨壺

德馨悅帑

三世一致

封培善根

宜達而窒

歸成後人

篤生賢孝

復出人羣

持衡機務

叶贊經綸

華軒駟馬

乃大于門

不有其美

推功本元

爰求我銘

載茲其芬

我觀資德

才全德洵

仁以濟物

謙以持身

須彼陰積

蔚為名臣

隆隆新丘

萬象傍隣

表列華柱

石卧蒼麟

神維顯思

孰知蒿蓀

匪義奚立

非孝無親

移忠于上

垂裕後昆

恒岳之陽

潭池滌淪

淵峙無極

永昭刻文

秋澗先生大全文集卷第五十四

秋澗先生大全文集卷第五十五

碑

大元國趙州創建故開府儀同三司中書
右丞相贈太尉忠武史公祠堂碑銘并序
自昔以功德而獲大任既沒而饗常祀者鮮矣况得
匹夫匹婦之心者哉如武侯卒而蜀人祭於陌梁公
去則魏土廟而食寥寥千載幾何人斯若太元郡趙
相師表百辟名節獨著薨謝之日葬加賻碑賜銘士
無異議民有報祀而得衆心之同然者今於忠武史
公見之公肇自

太宗朝襲世爵付以全趙四十餘城俾撫而寧之既
而公宿兵陽夏歲例歸眎師每過趙遲遲而去蓋以

郡南離兵燼經涂南北環視千里間煙火蕭條殆無
生意公憫其如是必為察民情之疾苦吏治之得失
賦役偏而不均獄訟冤而且滯此則便於民也知而
即為彼有害於政也立與之革至於營帳之驛驛使
輶之求索自貶威重告語約束未嘗以疾伯自居其
興除寬假之力又有大過人者如壬辰後有人以
白衣經會場七縣間不逞輩餘千人誅結已定鴟蹲
蟻聚伺昧嘯克約屠城藉資據之以叛內外交關皆
期竊發適公歸至郡有以變告者公沉思意以有亂
之萌無亂之形處之為最艱緩之則失事機急之則
趣其變公外示閑暇覘黨魁所任率部曲十餘騎出
不意掩捕獲焉詰之具服示所犯律諸市以徇隨移

告屬邑曰渠率已殲餘不一究以安反側趙人遂安
迨壬寅歲 詔作丘甲時歲荒民移排抽戶推事竟
推不滿者三十數有司以狀白公曰業無所於取缺
之以需可也守吏以軍興嚴惴惴不敢諾公曰以民
困故非敢私脫有悞責我任不汝及也殆紀後乃如
約不數年保障休息恒襄間熙熙然一樂國也公薨
後十五年前蘭溪溥郡人李瑛熹義重報貞而有幹
為 日謂趙之父老曰吾儕小人樂有家室得至今
日者可不知其所自斯皆忠武公恩造骨而肉之之
德也終無以圖報將死有餘負惟是起祠奉祀庶疇
萬一衆曰諾遂相與協力作新廟於郡城西里迄三
載廟成神栖像設翼翼有儼凡用錢三千七百餘緡

已而州貳政脩人賈英嘗屬橐鞬左右公覩其若爾
感念疇昔曰丕厥構則罔及迺以樹碑頌德爲已任
以其知公平生頗詳不千里遠請書其事於石其以
下吏故有不敢多讓者因勉爲次系之公諱某燕之
永清人姿忠亮謹畏以度量雄天下歷事四朝入則
坐廟堂出則分閫寄者五十年當其臨大事決大議
夷大難不動聲色卒之收尊主庇民之功此天下
所共知茲不復云願惟治趙之績在公雖一事惟其
思造之功至故能感民心也深化強梗而爲善良易
慷慨而爲忠厚以致其生也如父母戴之其沒則以
神明事焉嗚呼休哉人稱至人不死以氣之精大賢
不凶得氣之英公英爽在上其眷戀於趙人也審矣

仍作歌詩遺之俾歲時虔饗以侑肴蕙椒漿之薦其
詞曰

常山鬱兮蒼蒼陣堂堂兮公則亡趙之封兮四開風
雲慘兮漢故臺望公不來兮莫知我哀公精英兮弗
昧山川開闔兮不隨以晦公不忘兮德在民思之在
心兮其存則目存之目兮思則固廟而貌之兮其以
故招公來格兮歆嚴裡颭冷颿兮雲旂紛愴光靈兮
愈於生存福我兮孔那驅癘疫兮辟妖訛風時雨若
兮歲時和民報祀兮心乎靡佗坎坎擊鼓兮舞僎僎
饗有着烝兮登有歌麗碑峨嵯兮永言不磨

大元故懷遠大將軍萬戶唐公死事碑銘

并序

天下有馭戰之士拳勇絕人捐軀徇國雖一時之短
其義烈言言超千人而挺生奮百世而獨存者誰乎
南陽唐公其人也公諱琮世居內鄉縣浙川之白亭
伯祖諱臯金季以鄉豪署峽口鎮將父諱慶仕亡宋
用邊功起身自保義郎京西副將累遷至左領軍上
將軍諸軍統制歸附 皇元後終江淮軍民安撫使
唯襄鄧自昔爲用武地唐氏世鍾材武繼領韜鈴剛
毅奮發馳聲疆場稱山南名將家公軀幹魁傑而善
於騎射黝色鷹視氣吐鍾鉉然擐帶橫槊出入行陣間
人愕而聳之至元十三年襲父爵授武略將軍管軍
總把明年丁丑轉武德復安撫使仍佩金符十六年
考勞績進階宣武授金虎符管軍總管十八年陞懷

遠大將軍萬夫長二十年改授唐州軍府萬戶二十
五年移鎮泉道屯駐春陵時安南保畧余域負固不庭
聖上赫怒詔諸道兵以討之公到鎮甫二旬而檄至
即閱數軍實申嚴節制明日大譙郡僚叙別或以期
遠緩發爲言公曰不可征討 國家重事忠勤臣子
大節况吾家三世迭將迨不肖之身分符額閭備具
爪牙

恩寵深厚思畢力邊陲以暢

天子威命則死之日猶生之年也尚敢以頌忌爲計
哉詰旦啓行旗旆精明鼓角清亮識者壯之遂會諸
將屯靖海境谿嶺湍嶮艱於馳逐北兵不習地里與
鱗介爭利於舟楫叢薄間已非所長加以瘴癘流毒

海颶騰炎吏士觸冒疾疫者過半躬自撫視左體右劑恩義備至若父兄之於子弟致人人感激思奮島夷幸我師不利乘便突出逞獐肆凶次年己丑三月大戰于鹽場之三江口公率衆先入所嚮披靡賊兵衆開而復合者數四致麾下散失公力戰手刺數十人以沒得年四十有九計聞部曲至刲股肉致祭朝廷爲嗟惜之公天資雄峻沉鷲有將略號令精明卅循有素期於恩威兼濟當戰陣際奪勇愾敵不自顧藉有古烈士風擊故所向克捷自筮仕不十年正位帥閩平居與人交氣怡辭溫謙恭惟謹未嘗以色待物人視之儒素也其死生義利胷中權衡素定決非奮不慮死徼取美名者嗚呼忠義天下之大閑志

士仁人終始一致雖顛崙位不吾壓也豈以暫不幸而墮吾名節哉王者推而褒之所以砥礪多士窒不軌也故周崇死政漢寵死事然皆有等級次序俱未若皇元即以父祖之爵祿畀其子孫有崇無降其報卹激勸之典視前代爲重公可謂得死所矣夫人李氏亦內鄉大家資度純懿克嫺公德孝以奉舅姑慈以鞠幼稚生三子一女孟曰世忠仲曰世英季曰和尚孫二長靈童次保保世忠子也世忠嗣奉世爵往奠舊服追忠思孝因替箕裘奉公衣冠葬襄陽穀城縣鳳谿鄉丙山先塋之次起祠墓前歲時享獻庸展哀慰復念非假辭紀錄曷以垂鴻無窮儻得書太史氏則先業爲不朽矣遂介祕書監丞申敬載拜來請某

以忠君孝親係風化所在有不獲諱者輒論列而係之以銘其諱曰

武當西來萬馬驤

漢水東注為滄浪

鳳谿之里穀伯邦

盤盤沃野開荆襄

丙山衣冠唐所藏

維茲唐侯百夫防

佩服義烈南方強

三世崛起參戎行

幢牙茸燾金節煌

王常鐵石我所將

維南有交代用張

一軍來戍心靡遑

萬甲夜卷趨敵場

桓桓不憚天戈攘

誓此一去批其亢

春陵宴訣何琅琅

山谿矢勢臣分當

鮫鱷肆毒紛蜂螳

落落銅柱鷹孤揚

海霧翻瘴霾三江

奄奄戰鼓聲則鏗

一債不掇千夫僵

蛟匣零亂劔有光

臣維有賈甘自戕

一日之短百世長

恨以鱗介易我裳

義存義亡臣節昌

勝負况復兵家常

卹典昭報恩澤霽

嗣侯孝思示不忘

葬而從祖饗有堂

巫陽下招為悲傷

羈棲胡為滯此荒

魂兮歸來安故鄉

牲牲肥膾羅酒漿

部曲儼侍備兩廂

鼗鼓鏡鐸聲鏗鏘

子孫歲時供蒸嘗

銀鉤翠琰勒我章

忠傳孝繼溷大泮

陵遷谷變事叵量

英聲載世永不亡

順德路同知寶坻董氏先德碑銘有序

至元十七年奉議大夫盧越監使司提舉董侯孝良以規辦功最陞授朝列大夫同知順德路總管府事自惟材疎能謙何以臻此茲蓋祖禰積德系行涵濡慶澤所從徠遠矣惟是斷銘樂石光賁松梓庶克俯信適追仰報同極廼介府幕陳從慶贄禮幣百拜以先塋碑爲請承乏燕南以明新是任惟孝與義爲世大經今猥來屬筆有不當辭者謹按所具事狀董氏世居燕之武清縣南仁佛里金大定十二年改新倉鎮作縣故今爲寶坻人曾祖以農爲業代遠偶逸名諱生三子曰永進曰仲仁曰葉昆仲既蕃孝愛日篤以貴雄一鄉永進娶彭氏女實生寶溢府君諱柔蓋侯之皇考也府君行孝廉善居室一介不妄取與

諸人里中以善人稱之二親嘗卧疾治療同効府君曰嘗聞人之肌肉可愈困瘵於是默割股肉雜它膳進之服之果良愈既而父目病幾於凝育府君又以舌日舐其睛無幾頃還舊觀邑里稱嘆以爲孝感所致云嘗以事之保暮行通衢間蹙得白金一巨餅楮幣百餘緡詰旦持坐獲所候求訪者失主至物色爲不妄即付之至於牟子錢貧不克償者率折其券以貸自是孝廉之名軒著燕保間當途者聞之以謂不苟於得可以臨財厲俗用薦檄充保定務商權次遷寶溢塢監支納益用心稱物極平施之方公私俱有賴焉至元十三年以疾考終牖下享年七十有八董氏其三代皆寔寶坻故塋至公始徙家武清之大直

沽遂敗卜聚落之南原是爲武清新任孺人蘇氏信
都大家事舅姑主內務以孝婉聞生子男三人孝義
孝溫孝良太君資藉訓迪納規矩中者居多故母儀
婦道宗族取法焉今年九十有四起居飲食精健如
五六十人孝義有融德不樂仕宦二子長曰順管勾
鹽場事次愛孫孝溫醇謹有幹局充鹽使司判官三
子和張驢昌孫和任監當官和之子八十買住孝良
孝友純至幼習司空城旦書及長兼通 國朝語嘗
給事貴近以材果管勾三汭沽鹽官事至元十年秋
大霖三汭被浸亭戶例狼藉阻饑侯致卹申明上官
發廩米四千餘石侯乃計口均給民免菜色水退侯
謚度原隰終復爲惠議戶抽一推起土障場請於上

允焉明年水果至無所虞矣以能陞本場鹽司大使
仍佩金符以寵異之先是歷年牢盆錢不計成鹽多
寡即驗丁全給致本耗而課不充後復給與不時課
不辦而卒日困侯白所司革焉遂驗亭戶煎數在官
仍半給之復需其畢運爲足其所當付至曩之倚而
未頒者仍皆爲畀之至今遵行官卒兩稱其便卜三
年亭戶乏哺無可於糴侯以鬻造孔棘恐軼歲辦出
私廩二百餘石稟食之未嘗更其費十四年用薦欽
授 宣命官奉訓大夫尋陞奉議兼提舉蘆越鹽司
事十七年以均幹有方程辦饒羨積前後勞遷授今
職侯以民社重寄非財賦可擬宣力有加焉子三人
長曰革中書省宣使次安住次海山鐵哥初寶溢府

君割股肉以致親和厥後府君泊太夫人蘇氏在疾
子孝溫及侯與室劉氏亦踵而行之由是鄉里論篤
孝者以董氏為稱首嗚呼孝者人子至行揚名顯親
之大致也然代以孝名者非一若休徵之剖水求鯉
孟宗之泣林取筍李建進藥而病即瘳盛彥慟哭而
明復故今董氏之刻肌而愈親疾可謂情迫孝至殊
途而同歸者也詩曰孝子不匱永錫爾類其是之謂
歟至慶流胤裔移理於官宜矣後之來者復能致竭
兩間以極忠厚孝廉之美將見董氏福祿淵流而未
央也是宜銘銘曰

暨暨董氏 起家幽墟 繫曾祖君
是生三珠 孝廉溫潔 玉瑩不俞

我屋豐潤 爾焉德劬 維寶溢君
乃皇厥圖 一廉厲俗 致身仕途
我幹我均 我推我酌 人勉不足
我恢有餘 夫孝何居 曰父母且
病則致憂 已何暇虞 越惟親安
其樂愉愉 要以情至 同歸途殊
錫我胤類 德耳不孤 篤生賢孝
高大門閭 連城具贍 有儼倅車
顯親揚名 實由懿模 適追圖報
於焉是需 岌峙豐碑 螭首龜趺
丐我銘章 大書特書 幽陵蒼蒼
渾流徐徐 照映鄉梓 永示德隅

故提刑按察簽事劉公墓碑銘并序

奉議大夫提刑按察簽事劉公既窆之明歲其子珪感然以追遠之志來諭曰孤不天先君勤黽王事方期顯歷半道傾摧俾任重致遠之舉同克攸盡在孺慕終養之榮曾弗少及不孝之大無足言者維是刻銘麗石表見墓道庶不朽而為新壠光幸憲使憫焉惟曩嘗與公翱翔中書有聯事之雅以分以義有不不敢為亡友靳者謹按事狀公諱濟字巨川其先真定行唐人世在野大父個儻尚氣為鄉曲所重考信方直有父風以植產致富心存樂施貞祐兵避地陳穎聞散財濟衆人多傾赴正大末所在遊騎充兵令民團結相保衆推公充鄉義兵都統已而歿于事

公信之豈嗣也自撻角姿嚴恪不知為兒嬉及長明吏事時趙人董珎者來領魏郡材公為即署府從事民政軍務多所裨益中統建號省府立擢賢舉能以恢廓宏綱為亟路辟公應選遂補省左曹掾四年間精覈吏務氣明而事辦然所期攸邈有不屑為者尋除貳上都糧料使會當估平致太庾京積已而充中書磨勘官真定郭文進者撫白肖二人毒殺其父歲久莫決府以疑獄聞命公往讞既至按覆簿牘推察物情不終日而虛實兩判鎮人稱其明朝官嘉之至元七年勅授承直即太原路總管府判官公不卑小官思以行志惠吾民為念府東有山曰罕山每溝澮秋泛害及閔坊公廼度原隰相水衝以事宜從上

官議可焉衆欣就役自山南抵汾壩鑿渠余十里以
醜水勢自是漂沒患絕且溉傍田數百頃其興利除
害類如是明年夏六月大旱步禱列石龍祠應焉秋
賴以熟九年陞授奉訓大夫知獻州事既下車囚繫
填徃犴間公歎曰盡心之戒當於焉是圖遂裁遣剖
折凡五日牢戶為一空然後束吏以法拊民以寬慮
科調之不均也為等第之恐田疇之未治也為勸劭
之新州治以具視瞻崇儒學以敦教本內外釐補井
井有條其孝悌任卹之化風偃海濱矣迄今民思不
忘秩滿憲司廉其能遷奉議大夫簽書燕南河北道
提刑按察司事十六年四月竟以勤事致疾既乃終
于仁享年六十有四夫人程氏魏大家配公德良稱

前四年卒即其歲九月十九日附熿名縣賢相鄉
由盆里繁水之陰宅新兆也二子珪玘今玪亦官承
直郎大名路總管府判官性純孝從政幹果玘歷管
庫甚愿女三人伯適趙郡武氏仲從鄒氏季徐氏公
資明辯遇事風生不肯陸陸一事落人後故所至卒
有聲其孝義出天性固然初調并梁兵西援膺臆事
集悵望南雲泣焉興感曰母氏殯陳四十年不即卒
大事儻溘先朝露月其能瞑耶乃於介使告其所以
然諾焉馳至陳求訪叢垠間罔知誰何因籲天行泣
俄得劉叟者示其處下挿驗所誌物是夕寤寐中又
有以呵之者曰汝母何疑當收之速去即是年冬十
月歸葬行唐縣甘泉鄉七里烽之先塋禮也傳稱吉

人行役云遠必思念其親以篤孝養若公斯舉何思
遑將其母哉又鄉豪董君死葬瘞陶碑石卧荒壠間
身後貧不克剝樹公按部過趙為求銘表墓以報知
已其風義肖上世又如此是宜銘銘曰

古評吏治 匪循即能 循傳而列

能或槩稱 時有緩急 事方責成

珮玉長裾 艱於奉承 維材應變

其任乃勝 用或異宜 跌焉不興

暨暨劉公 才長氣弘 小試游刃

銳於發矟 擢列郎曹 風生臺閣

若不屑為 翩翩荷橐 一麾出守

殆古能吏 錯節蟠根 別夫利器

苟利吾氓 身弗遑耽 于今兩州

懷恩無斁 維孝與義 為世儀軌

子箕而裘 已濟厥美 歸息泉扃

神亦寧止 五鹿之野 由盆之里

沙麓茫茫 繁流瀾瀾 谷變陵遷

墓碑有鬼 大都通州郭氏遷塋碑銘并序

孝子之愛其親也心無乎不至其始也盡懽心以致
其樂僖高爵以顯其宗又以安富尊榮歆其親以愜
其志望及其終也擇善地敞真宅樹豐碑彰遺媿別
為再祖俾饗大宗不遷之祀越是心以為校者於尚
書郭君見其純且至焉郭氏世為通州潞縣人曾祖

府君諱伯昌尚義有應劇才金季以勞授州之判官
方四郊多壘仍歲饑荒賴公力全活者衆民刻惠里
廟至今其石宛在金制官分嚴不敢絲髮侵上承下
辦惠鮮保障能尔其爲人可知已大父諱和字和之
資持重擇交而游經紀遠識殊與父肖貞祐初燕不
能國遂避地徙河南公奉從母楊挈弟姪至復還鄉
梓往返數千里間冒涉艱梗舉宗全慶竟不失舊物
是亦人所難能郭氏之有今日其祥實開於此公少
樂讀書長以吏業著稱且玄之與路在昔爲轉漕淵
會見閩習熟故公於綱計爲詳壬辰歲 詔立漕司
於燕明年癸巳中書粘合公辟公爲經歷官舊條計
制兼舉而行居無幾何民力大紓而廩儲崇積會計

出納允當詳明官無私焉至今論漕運者皆以公爲
稱首

國朝丁未公春秋五十有九卒官下祖妣孫氏出庶
之清門內助成家與公合德後公北一年乙亥歲壽
八十終生二子長諱天珪字君寶次天瑞晦德不仕
棣華輝映樂怡怡也鄉里以善人歸之長即尚書君
考秉德清慎直諒多聞以世美繼爲漕幕從事爲人
樂易輕財好施雖指困解驂未嘗見難色樂從賢士
夫游延致禮待惟恐不盡又通五行書叩之者推明
倚伏率以戒諱爲言斯亦知命君子者歟惜乎年不
滿德仕未盡用至元改号夏四月廿四日以疾卒壽
止四十有七子秀生纔十四歲矣夫人張氏燕之名

家性真靜壺儀有光漕司府君既歿夫人持內事甚嚴家道昌宜內外宗屬入門升堂不覺其母子之互為資也享年七十有四終所居正寢實至元廿九年壬辰秋八月八日也秀字秀實姿善淑少以孝聞交於友以誠移於官則理儀觀魁偉臨事明敏有盼藉甫冠由總制院都事遷經歷官繼改都省左司員外郎尋就陞郎中已而授少中大夫禮部尚書今簽宣政院事君自惟起身刀筆不十年致位通顯德薄才菲將何以臻此茲非先世積善索慶光潛不耀一旦叢於不肖身者如此是用祗懼昊蒼罔極報德何從頤惟長城先壠歷年蘋芥封馬鬣傍無所取况故祖考叔父而下三樞皆未克大葬言念夔傷茲刺負背

乃改卜宛平縣張華里之北原墨食吉用三十年春二月壬寅以三品儀物封而樹之庶幾無乎不在之心少有遂焉既襄事百拜以墓碑來請幸內翰惠頌三讓求益懇予以孝子順孫顯揚慎追之義閔人倫風教者為最謹按善狀諾而銘諸銘曰

慶由善先順為福原惟積也厚其流則淵譬彼播植用其道而分所宜其根苗華實有不期然而然猗歟郭氏宗族嬋媽繫長城之故壠不知其幾世幾年堂封纍纍拱木蒼煙徧道涂而且隘無可允而理必遷張華西里其平宛宛風水攸寧鬱焉新任哀哀送終棺衾華鮮祭以大夫有加鼎籩祔安神靈既厚且堅庶窀穸之下慰將寸心之少安孰無子孫焜燿聯翩

念得之而能竭力讓春官之孝賢刻吾銘而表神道
永以爲郭氏無窮之傳

大元故中順大夫徽州路總管兼管內勸
農事王公神道碑銘并序

上登極之二載詔以前泉州路總管中順王公作尹
於徽制下而公已卒士論慨嘆惜其備具文武才未
究於用也明年春正月嗣子謙持太史屬王德淵所
撰善狀百拜來請銘自惟識公始用情交終以義合
至元庚寅歲邂逅於歐閩後二年予入翰林公亦終
更來燕玉堂多暇日夕從游詡詡相得校夫三十年
間會晤雖數在京師爲最洽公今已矣銘其墓宜莫
予若公諱道字之問姓王氏其先爲京兆終南縣人

世將家公姿魁偉勇而多力幼讀儒書長喜武事飛
箠走檄充翩翩也公既負器局挾藝能不肯碌碌居
人後間出大言押闔時事及作爲歌詩藻思甚壯激
昂頓挫以驚動一世謂將相無種功名可灰契致也
然于時貴近終無所合至元更化以剔民蠹清吏弊
爲亟公曰茲吾之時也迺走燕上書請置執法官如
是則吏畏政肅澤被於下政化可得而成六年憲臺
肇建遂辟充掾史公志在澄清一旦抱疇齷齪鳧進
論得失於簿領間耻於屑爲纜數月即拂衣而去適
朝家遴選文學士充東宮講書官用昭文寶公薦
得入侍經筵進讀際辭理敷暢間以時務意在互有
發明由是稔知爲奇士進見顧眄與餘人異欲大用

而有需也十三年江左平福建內附蠻夷悍輕易怨以變蛇豕焚焚血人于牙何所靳顧非大行臺填之不足以制內而撫外也故即署官重其人方

裕宗皇帝參聽朝政廼選公充福建行省左右司郎中時柄用者專尚威猛不能導揚恩信慰安遠人九事之悖理政之害民及私意之所宿者公皆執而不行至面折力諍必理得事正而後已如宦族趙知府元輩六十三家閑居室潤誣與山賊通擬挺殺之意在籍沒掩利餘貲公抗言宋故官累詔恩卹今以昧曖一槩奴戮有傷朝廷好生之德止杖八人餘悉縱遣降將吊眼陳據漳州叛賊勢張甚招討潘力不支踰城走泉行省以失守罪縛出將戮焉公曰

招討秩三品有罪當稟於朝不可擅殺上官奴遣

督將二人率甲士環公曰字不同署罪當相及公乃具朝服望闕再拜曰省官不有朝廷脅我以兵

欲將何為吾寧與潘同死字不可得也彼莫能屈潘竟減死論其守止不屈類如此由是強橫氣褫善良攸賴閭閻間至盡公像事之廿四年授中順大夫泉州路總管兼府尹泉據南海津會豪僧吏商假權貴聲勢日凌輒請索紊大府紀綱牟取衆利公折以理拒以威輒落其機牙束手噤語而去公堂為肅然先時晉江之安溪土賊張大老方德龍嘯聚畬洞無賴二萬餘人時出搶略為一方大患者幾三十年聞公至私相約束曰王老子來當謹避之勿輕出公為布

耳目設方略不月踰生擒賊酋北三人悉榜殺泉市
餘衆駭散百姓爲之歌曰藥不瞑眩而疾祛非良醫
而誰乎兵不血刃而賊除非智士而誰乎其爲輿情
感悅可知矣在任凡四載代歸鄉里以營治先塋樹
植碑表爲務屢供具召親友燕衍爲樂若日不足者
家人亦訝其遽如許也元貞二年春二月十有二日
以疾終私居正寢享年七十葬維州北海縣樂泉里
金山原公強矯有守臨事敢言膽氣噴薄無所回撓
志在開布公誠砥礪名節表表有見於世孰謂勢利
可得而奪邪至於擿姦發伏不避持難又似夫漢王
尊之在東郡虞詡之治朝歌也奮身布衣起家至二
千石剛直之氣至老不衰其功業止斯而已此士論

所痛惜也遠祖金初以武功賜完顏氏世襲千戶官
至金吾衛上將軍曾祖諱虞卿大父諱從正歷隰州
太守父諱成皆嗣承世爵金亡復故姓仕

國朝任樂安縣令因家焉今爲廣固人公先娶孫氏
生子謙夫人年廿八卒繼室羅氏亦先公卒生二子
曰諒曰惠謙幼侍 東宮才敏有時譽能政克家蔚
有父風今官奉訓大夫大司農少卿男孫四人謙之
子三曰元孫仲孫季孫諒之子一曰彥孫公平生著
述號雲門老人集殆千餘篇傳于家銘曰

繫王使君起海堧妙齡飛英振孤騫陳琳書檄何翩
翩一箭擬下聊城堅心惟嫉惡民瘼蠲驅逐鳥雀同
鷹鷂一行作吏非所便褰帷有志澄八埏封書直上

沃 帝淵太微執法光炯然 春宮嚮學開經筵一

日登對席為前顧公可試宜擢遷利器當遇蟠根宣

歐閩行臺兩廣連陽舒陰慘持化權幕非其人奚望

旃六十三家宋故官執之狂死何繁寃公為辨析皆

平反潘惟不支心則丹以死信理人所難維閩之南

大府泉畀公撫循面則顛鋤難強梗安惇鯨風颿踔

救教反 救用反海魚龍翻萬貨山積來諸番晉江控扼實要關

勢取豪索非一端不動聲氣為周旋安溪有盜勢結

盤撞塘呼號動百千公然剽竊三十年為一郡患何

迤邐公來約束毋妄干老熊當道百獸跼一旦解刀

耕壟間溪山淡淡風日閑帥得其人人自安如君兩

除稱衡銓幕府坐嘯鳴化絃簡節疏目政猛寃四載

終更公孰賢王尊虞詡相後先千年神劍埋山原鬱

鬱夜氣生紫煙何以驗之石有鐫

秋澗先生大全文集卷第五十五



